

太上靈寶天尊說延壽妙經

爾時

靈寶延壽天尊在南極天中金光山內寶林樹下 凝神念道 共十千徒
 眾 解說 延壽妙經 論虛無大道 遍體光明 洞照天地三界十方
 一時震響 復有諸天上聖 一切鬼王 天龍十部 尋光而至 上
 詣天尊 乞無生死 五體投地作禮神尊 依位而立 時有延命真人
 廣福真人 金華真人 妙喜真人 紫蓋真人 黃籙童子 碧霄童
 子 青華童子 白惠童子 及以一切聖眾 皆獻寶花 百味香藥
 手執日月靈幢 紫光神節 十絕靈幡 延命寶蓋 次第行道 燒香
 散花 齊唱延壽天尊 咸得度世 爾時神尊含笑巍巍 從大頂門放
 十道神光 普照法眾身心無有悟者 於是道場中有一童子名曰善達
 前進作禮 上白天尊 見在座中皆是變化神仙 何得未悟 伏願
 尊顏 為臣解說
 天尊言曰 此之仙眾雖有神通 實無真道 童子曰 不審何名真道
 天尊言曰 不生不滅 名為真道 無去無來 亦名真道 於不生不
 滅 無去無來 亦昧真道 一切法相 皆為虛妄 世間男女 若欲

太上靈寶天尊說延壽妙經

清微藏書閣

延命長年 消災集福 但自精心燒香行道 布施放生 建造功德
 念經供養 兼請道士法師 講讀尊經 本命齋醮 即有注算神王
 記名神王 落死神王 上生神王 保護念經之人 錄其功德 奏上
 諸天 金帛豐足 永保安寧 於是諸天大聖 一切鬼王 稽首歸依
 皆大歡喜 累劫學道 未聞此經 並是金口之言 於是 鬼神發
 弘誓 願生生世世眼見真仙 耳聞正法 禮拜十齋 常行至道 天
 尊再留偈曰
 生前不慈孝 死後報何恩 悲啼在地獄 誰明勸善言
 修善自歸善 作惡歸惡源 至心常供養 延壽遇神仙
 寫經及造像 福祿自延年
 是時 座中一切真仙聞經 皆稱不可思議 再拜而退

太上靈寶天尊說延壽妙經竟

天運辛卯年酉月正一天師清微弟子洪鼎堅羅大英恭錄彙編